

1999-09-30- SS Ioannes Paulus II - Epistola ‘Fratri Marcello Zago’

LETTERA DI GIOVANNI PAOLO II A S.E. MONS. MARCELLO ZAGO, INVITATO SPECIALE PER LE CELEBRAZIONI DEL CENTENARIO DELLA EREZIONE DELLE PRIME TRE PREFETTURE APOSTOLICHE NELL'AMAZZONIA PERUVIANA

Venerabili Fratri Marcello Zago Secretario Congregationis pro Gentium Evangelizatione

Christus, qui omnes homines vult salvos fieri et ad agnitionem veritatis venire (1 Tim 2, 4), Evangelicum nuntium ad extremos terrae confines perferendum iussit, quapropter contionatores Verbi Dei ad hoc mandatum exsequendum in diversas orbis continentibus se contulerunt.

Salutaris quidem Veritas anno millesimo nongentesimo Amazonias Peruviae regiones contigit, ubi constitutae sunt tres primae Praefecturae Apostolicae in locis scilicet de Ucayali, Sancti Leonis de Amazones et Sancti Dominici de Urubamba. Christianae fidei semen, annorum decursu, instar grani sinapis, penitus radices immisit; hac de causa, percrebrescente fidelium numero, memoratae Praefecturae in octo Vicariatus Apostolicos sunt divisae, qui appellantur: Iquitosensis, Giennensis in Peruvia, Pucallpaensis, Portus Maldonadi, Requenaensis, Sancti Iosephi de Amazones, Sancti Raymundi et Yurimaguaensis. In praesens vero illae ecclesiales communitates ovantes plaudentesque se parant ad centenariam memoriam ab illis conditis Praefecturis colendam.

Ita, quo haec commemoratio magnificentius emineat, sacri Praesules illorum Vicariatum, de unanimi quoque omnium Episcoporum Peruviae consensu, a Nobis postularunt ut quendam sacrum Praesulem illuc mitteremus, qui ibidem Personam Nostram tueatur partesque Nostras sustineat. Nos quidem eorum postulatis libenter concedimus. Cum vero compertum habeamus eiusmodi centenariae memoriae celebrationes anno bismillesimo ineunte, in contextu nempe Sacri Iubilaei, illis in regionibus peragendas esse, Nos hisce datis Litteris Te, Venerabilis Frater, ad id munus explendum constituumus MISSUM EXTRAORDINARIUM, mandatis Tibi datis, ut apud illos christifideles nomine Nostro intersis celebratibus habendis die XXX mensis Ianuarii apud Metropolitanam Ecclesiam Limanam ac die V mensis Februarii apud Sanctuarium Sanctae Rosae Limanae dicatum.

Omnibus ibidem astantibus fervidam Nostram salutationem ac benevolentiam porriges, pro Nobis sacris liturgicis praeroris, sermone Tuo Nostram ad mentem eventus illius momentum atque opportunitatem pristinum fervorem renovandi illustrabis. Magna quidem spe fore confidimus ut dilectae illae communitates e laboriosa centum annorum evangelizatione, dum tertii millennii limina sollemniter ingrediuntur, maius adhuc capiant incrementum.

Ut haec Nostra adimpleantur optata, Ipsi pastorum Principi eas enixe commendamus votaque facimus ut singuli fideles novum suscipiant animum ad vitam christianam firmius solidandam. Tu vero pro certo noveris Nos missionem Tuam fervidis prosecuturos esse precibus.

Interea Tibi, Venerabilis Frater, locique Praesulibus cunctis et Magistratibus nec non universo clero populoque talia sollemnia colentibus, Benedictionem Nostram Apostolicam, divinarum gratiarum nuntiam et sincerum spiritalis prosperitatis documentum, veluti praesentes ex animo dilargimur.

Ex Aedibus Vaticanis, die XXX mensis Septembbris, anno MCMXCIX, Pontificatus Nostri vicesimo primo.